

Bandar Baru Kundang tenggelam


Air naik hingga paras pinggang, empat dewan penempatan sementara dibuka untuk penempatan mangsa banjir

KUANG - Air naik sehingga mencecah paras pinggang di kawasan Bandar Baru Kundang di sini sekitar jam 6 petang kelmarin dan mula beransur surut antara jam 12 tengah malam hingga 7 pagi semalam.

Tidak sampai seminggu mengemas rumah akibat banjir kilat Isnin lalu buat kali keempat dalam bulan November, rumah penduduk dilanda bencana lagi.

Seorang penduduk, Siti Haloyah Rahim, 47, berkata, pihaknya mengharapkan bantuan daripada kerajaan negeri menyelesaikan masalah yang berlarutan sekian lamanya dan semakin teruk ini.

"Air naik sampai paras pinggang, dalam rumah saja tingginya dah mencecah hingga tangga keempat. Pangsapuri berdekatan yang



Rumah Siti Haloyah tenggelam lebih sepuluh jam sebelum surut sepenuhnya jam 7 pagi semalam.


tak pernah kena banjir pun terjejas kelmarin.

"Paling teruk banjir 2013 pun tak seteruk semalam (kelmarin). Hujan 20 minit saja air dah naik. Semua sungai melimpah dan nak surutnya juga

ambil masa lama," katanya semalam.

Katanya, peralatan rumah banyak terjejas kali ini termasuklah peti sejuk dan mesin basuh yang tenggelam.

"Sebab semalam pulang



Limpahan air sungai yang mengakibatkan kawasan rumah penduduk tenggelam.

kerja lambat sampai rumah saja air memang dah naik. Perabot yang ditinggikan atas kerusi pun tenggelam. Kabinet dapur juga kembang.

"Harap kali ini kerajaan negeri dan pihak berkuasa

tempatan serta pihak berwajib ambil tindakan. Sungai sedia ada tak mampu nak tampung air lagi. Cari juga punca yang menyebabkan kejadian semakin teruk," katanya.

Sementara itu, Penyelaras

Pusat Khidmat Dun Kuang, Salasiah Disa berkata, sebanyak empat dewan dibuka sebagai penempatan sementara kepada mangsa memandangkan paras air yang tinggi membahayakan penduduk untuk berada di rumah.

"Boleh dikatakan lebih seribu rumah terjejas dan paling teruk adalah di Bandar Baru Kundang, Kampung Bunga Raya, Kampung Melayu Seri Kundang dan Kampung Orang Asli Ulu Kuang.

"Ada antara penduduk tidur di dewan dan ada juga beransur pulang selepas air mulai surut. Kami turut sediakan makanan kepada mangsa di dewan bagi kurangkan beban.

"Berbanding Isnin lalu banjir kali ini lebih teruk bila seluruh Bandar Baru Kundang tenggelam," katanya.